

南北史合注

欽定四庫全書

南北史合注卷九十四

明 李清 撰

齊本紀下第八

北史八

世祖武成皇帝諱湛神武第九子孝昭母弟也儀表瓌
傑神武尤所鍾愛神武方招懷荒遠乃為世子娉柔然
太子菴羅辰女號隣和公主世祖時八歲冠服端嚴神
情閑遠華戎歎異元象中封長廣郡公天保初進爵為

王拜尚書令尋兼司徒遷太尉乾明初楊愔等密相疎忌以王為大司馬領并州刺史王既與帝謀誅諸執政遷太傅錄尚書事領京畿大都督皇建初進位右丞相孝昭幸晉陽王以懿親居守鄴政事咸見委託二年帝崩遺詔徵王入統大位發喪於晉陽宮崇德殿皇太后令司宣遺詔左丞相斛律金率百寮敦勸三奏乃許之大寧元年冬十一月癸丑皇帝即位於南郊大赦

三國典畧曰宣令於殿門外建金雞宋孝王不識其

義以問光祿大夫司馬膺之曰紫海中有占曰天雞
星動當有赦由是帝王以雞為候

改皇建二年為大寧乙卯以司徒平秦王歸彥為太傅
以尚書右僕射趙郡王叡為尚書令以太尉尉粲為太
保以尚書令段韶為大司馬以豐州刺史婁叡為司空
以太傅平陽王淹為太宰以太保彭城王湊為太師錄
尚書事以冀州刺史博陵王濟為太尉以中書監任城
王浟為尚書左僕射以并州守斛律光為右僕射封孝

昭皇帝太子百年為樂陵王庚申詔大使巡行天下求
政善惡問民疾苦擢進賢良是歲周武帝保定元年
河清元年春正月乙亥車駕至自晉陽辛巳祀南郊壬
午享太廟丙戌立妃胡氏為皇后子緯為皇太子大赦
內外百官普加汎級諸為父後者賜爵一級己亥以前
定州刺史馮翊王潤為尚書左僕射詔斷屠殺以順春
令二月丁未以太宰平陽王淹為青州刺史太傅領司
徒領軍大將軍宗師平秦王歸彥為太宰冀州刺史乙

郊兼尚書令任城王潛為司徒詔散騎常侍崔瞻聘于
陳閏二月後梁宣帝殂夏四月辛丑皇太后婁氏崩乙
巳青州刺史上言今月庚寅河濟清改太寧二年為河
清降罪人各有差五月甲申祔葬武明皇后於義平陵
乙丑以尚書右僕射斛律光為尚書令秋七月太宰冀
州刺史平秦王歸彥據州城反詔大司馬段韶司空婁
叡討擒之乙未斬歸彥并其三子及黨與二十人於市
丁酉以大司馬段韶為太傅司空婁叡為司徒以太傅

平陽王淹為太宰以尚書令斛律光為司空以太子太傅趙郡王叡為尚書令中書監河間王孝琬為尚書令僕射癸亥行幸晉陽陳人來聘冬十一月丁丑詔兼散騎常侍封孝琰使於陳十二月丙辰車駕至自晉陽是歲殺太原王紹德

是歲後梁孝明帝天保元年

二年春正月乙亥帝詔臨朝堂策試秀孝以太子少傅魏收為兼尚書右僕射己卯收以阿縱除名丁丑以武

明皇后配祭北郊辛卯帝臨都亭錄見囚降在京罪人
各有差三月己丑詔司空斛律光督五營軍士築戍於
軹關丙戌以兼尚書右僕射趙彥深為左僕射夏四月
并汾晉東雍南汾五州蟲旱傷稼遣使賑恤戊午陳人
來聘五月壬午詔以城南雙堂之苑迴大總持寺六月
乙巳齊州上言濟州水口見八龍升天乙卯詔兼散騎
常侍崔子武使於陳庚申殺司州牧河南王孝瑜秋八
月辛丑詔以三臺宮為大興聖寺冬十二月癸巳陳人

來聘己酉周將楊忠帥突厥阿史那木可汗等二十餘萬人自恒州分為三道殺掠吏民是時大雨雪連月南北千餘里平地數尺霜晝下雨血於太原戊午帝至晉陽己未周軍逼并州又遣大將達奚武帥衆數萬至東雍及晉周與突厥相應是歲室韋庫莫奚靺鞨契丹並遣使朝貢

三年春正月庚申朔周軍至城下而陳戰於城西周軍及突厥大敗人畜死者相枕數百里不絕詔平原王段

韶退出塞而還三月辛酉以律令班下大赦己巳盜殺
太師彭城王浹庚辰以司空斛律為司徒以侍中武興
王普為尚書左僕射甲申以尚書令馮翊王為司空夏
四月辛卯詔兼散騎常侍皇甫亮使於陳五月甲子帝
至自晉陽壬午以尚書令趙郡王叡為錄尚書事以前
司徒婁叡為太尉甲申以太傅段韶為太師丁亥以太
尉任城王湝為大將軍壬辰行幸晉陽六月庚子大雨
晝夜不息至甲辰乃止是月晉陽訛言有鬼兵百姓競

擊銅鐵以捍之殺樂陵王百年歸宇文媼於周秋九月
乙丑封皇太子綽為南陽王嚴為東平王是月歸閭媼
於周陳人來聘突厥寇幽州入長城虜掠而還閏月乙
未詔遣十二使巡行水滂州免其租調乙巳突厥寇幽
州周軍三道並出使其將尉遲迴寇洛陽楊標入軹關
權景宣趣懸瓠冬十一月甲午迴等圍洛陽戊戌詔兼
散騎常侍劉逖使於陳甲辰大尉婁叡大破周軍於軹
關禽楊標十二月乙卯豫州刺史王士良以良降周將

權景宣丁巳帝自晉陽南征己未太宰平陽王淹薨壬戌太師段韶大破尉遲迥等解洛陽圍丁卯帝至洛陽免洛州經周軍處一年租賦赦州城內死罪已下囚己未以太師段韶為太宰司徒斛律光為太尉并州刺史蘭陵王長恭為尚書令壬辰帝至虎牢經滑臺次於黎陽所經減降罪人丙子車駕至自晉陽

冊府元龜載是年詔每年春月早課農桑自春及秋男子十五以上皆就田畝桑蠶之月婦女十五以上

皆營蠶桑務使地無遺力人無游手

是歲高麗靺鞨新羅並遣使朝貢山東大水饑死者不可勝計發賑事竟不行

四年春正月癸卯以大將軍任城王潛為大司馬辛未幸晉陽二月甲寅詔以新羅國王金興真為使持節東夷校尉樂浪郡公新羅王壬申以年穀不登禁酤酒己卯詔減百官食粟各有差三月戊子詔給西兗梁滄趙州司州之東郡陽平清河武都冀州之長樂勃海遭水

滂之處貧下戶粟各有差家別斗升而已又多不付是
月彗星見有物隕於殿庭如赤漆鼓帶小鈴殿上石自
起兩兩相對又有神見於後園萬壽堂前山穴中其體
壯大不辨其面兩齒絕白長出於唇帝直宿嬪御已下
七百人咸見焉帝又夢之夏四月戊午大將軍東安王
婁叡坐事免乙亥陳人來聘太史奏天文有變占當易
主丙子乃使太宰殷韶兼太尉持節奉皇帝璽綬傳位
皇太子大赦改元為天統元年百官進級降罪名有差

又詔皇太子妃斛律氏為皇后於是郡公尊帝為太上
皇帝軍國大事咸以奏聞始將傳政使內參乘子尚乘
驛送詔書於鄴子尚出晉陽城見人騎隨後忽失之尚
未至鄴而其言已布矣天統四年十二月辛未上皇崩
於鄴宮乾壽堂時年三十二

三國典畧曰齊長廣郡廳梁木忽作人像太守惡而
刷去明日復出鄉人伐枯桑於中得折足死龍長尺
餘識者以為長廣齊王上本封齊氏木運得龍為吉

州司州之東郡陽平清河武都冀州之長樂勃海遺水
澇之處貧下戶粟各有差家別斗升而已又多不付是
月彗星見有物隕於殿廷如赤漆鼓帶小鈴殿上石自
起兩兩相對又有神見於後園萬壽堂前山穴中其體
壯大不辨其面兩齒絕白長出於唇帝直宿嬪御已下
七百人咸見焉帝又夢之夏四月戊午大將軍東安王
婁叡坐事免乙亥陳人來聘太史奏天文有變占當易
主丙子乃使太宰段韶兼太尉持節奉皇帝璽綬傳位

皇太子大赦改元為天統元年百官進級降罪各有差
又詔皇太子妃斛律氏為皇后於是羣公尊帝為太上
皇帝軍國大事咸以奏聞始將傳政使內參乘子尚乘
驛送詔書於鄴子尚出晉陽城見人騎隨後忽失之尚
未至鄴而其言已布矣天統四年十二月辛未上皇崩
於鄴宮乾壽堂時年三十二

三國典畧曰齊長廣郡廳梁木忽作人像太守惡而
剝去明日復出鄉人伐枯桑於中得折足死龍長尺

木枯龍死非吉徵至是崩

謚曰武成皇帝廟號世祖五年二月甲申葬永平陵

盧思道北齊興亡論曰武成少稟凶德不孝不仁龍攢在殯淚不承臉太后之喪亦不哀哭纔及公除便衣縫裘縱侈荒淫不知紀極甘酒嗜音夜以繼日

三國典畧曰武成後宮無限衣皆珠玉每歲費萬金寒月皆食韭芽

後主諱綿字仁綱武成皇帝長子母胡皇后夢於海上

坐玉盃日入裾下遂有娠天保七年五月五日生後主於并州邸後主少美容儀武成特所愛寵拜世子及武成入纂大業大寧二年正月丙戌立為皇太子河清四年武成禪位太子

天統元年夏四月丙子皇帝即位於晉陽宮大赦改河清四年為大統丁丑以太保賀拔仁為太師太尉侯莫陳相為太保司空馮翊王潤為司徒錄尚書事趙郡王叡為司空尚書左僕射河間王孝琬為尚書令戊寅以

瀛州刺史尉粲為太尉斛律光為大將軍東安王婁叡
為太尉尚書右僕射趙彥深為左僕射六月壬戌彗星
出文昌東北其大如手後稍長至大餘百日乃滅己巳
詔兼散騎常侍王季高使於陳秋七月乙未增置都水
使者一人冬十一月癸未上皇至自晉陽己丑上皇詔
改太祖獻武皇帝為神武皇帝廟號高祖獻明皇后為
武明皇后其文宣謚號委有司議定十二月庚戌上皇
狩於北郊壬子狩南郊乙卯狩西郊壬戌上皇幸晉陽

丁卯帝至自晉陽庚午有司奏改顯祖文宣皇帝為威
宗景烈皇帝河南大疫是歲高麗契丹靺鞨並遣使朝
貢

二年春正月辛卯祀圓丘癸巳祫祭於太廟詔降罪人
各有差丙申以吏部尚書尉瑾為尚書右僕射庚子行
幸晉陽二月庚戌上皇至自晉陽壬子陳人來聘三月
乙巳上皇詔以三臺施興聖寺以旱故降禁囚夏四月
陳文帝殂五月乙酉以兼尚書左僕射武興王晉為尚

書令己亥上皇詔封皇子儼為東平王仁弘為齊安王
仁固為北平王仁英為高平王仁光為淮南王六月詔
兼散騎常侍韋道儒聘於陳秋八月上皇幸晉陽九月
乙卯以太保侯莫陳相為太傅大司馬任城王潛為太
保太尉婁叡為大司馬徙馮翊王潤為太尉開府儀同
三司韓祖念為司徒十一月大雨雪盜竊太廟御服十
二月乙丑陳人來聘是歲殺河間王孝琬突厥韃韃國
並遣使朝貢周天和元年

是歲陳天康元年

三年春正月壬辰上皇至自晉陽乙未大雪平地二尺
戊戌詔京官執事散官三品已上各舉二人稱事七品
已上及殿中侍御史尚書都檢校御史主書及門下錄
事各舉一人鄴宮九龍殿災延燒西廊二月壬寅朔帝
加元服大赦九州職人各進四級内外百官普進二級
夏四月癸丑詔兼散騎常侍司馬幼之使於陳五月甲
午上皇以領軍大將軍東平王儼為尚書令乙未大風

晝晦發屋拔樹六月己未上皇詔封皇子仁機為西河
王仁約為樂浪王仁儉為潁川王仁雅為安樂王仁統
為丹陽王仁謙為東海王閏六月辛巳左丞相斛律金
薨壬午上皇詔尚書令東平王儼錄尚書事以尚書左
僕射趙彥深為尚書令并省尚書右僕射婁定遠為尚
書左僕射中書徐之才為右僕射秋八月辛未上皇以
太保任城王潛為太師馮翊王潤為大司馬太宰段韶
為左丞相太師賀拔仁為右丞相太傅侯莫陳相為太

宰大司馬婁叡為太傅大將軍斛律光為太保司徒韓
祖念為大將軍司空趙郡王叡為太尉尚書令東平王
叡為太尉尚書令東平王儼為司徒九月己酉詔諸寺
署所綰雜保戶姓高者天保初雖有優放權假力用未
免者今可悉蠲雜戶任屬郡縣一准平人丁巳上皇幸
晉陽是秋山東大水民饑僵尸滿道冬十一月丙午以
晉陽大明殿成故大赦文武百官進二級免并州居城
太原一郡來年租癸未上皇至自晉陽十二月己巳以

故左丞相趙郡王琛配饗神武廟廷是年突厥大莫婁
室韋百濟靺鞨等國並遣使朝貢

是歲陳主伯宗光大元年

四年春正月壬子以故清河王岳河東王潘相樂十人
並配饗神武廟廷癸亥詔兼散騎常侍鄭大護使於陳
三月乙巳上皇以司徒東平王儼為大將軍南陽王綽
為司徒開府儀同三司廣寧王孝珩為尚書令夏四月
辛未鄴宮昭陽殿災及宣光瑤華等殿辛巳上皇幸晉

陽五月癸卯以尚書右僕射胡長仁為左僕射中書監
和士開為右僕射壬戌上皇至自晉陽自正月不雨至
於是月六月甲子朔大雨甲申大風拔木折樹是月彗
星見東井秋九月周人來通和詔侍中斛斯文略報聘
周冬十月辛巳以尚書令廣寧王孝珩為錄尚書事左
僕射胡長仁為尚書令右僕射和士開為左僕射中書
監唐邕為右僕射十一月壬辰詔兼散騎常侍李翥使
於陳是月陳安成王頊廢其主伯宗而自立十二月辛

未太上皇帝崩丙子大赦九州職人普加一級内外百
官並加兩級戊寅上太上皇后尊號為皇太后甲申詔
細作之務及所在百工悉罷之又詔振廷晉陽中山宮
人等及鄴下并州太官官口二處其年六十已上及有
癰患者仰所司簡放庚寅詔天保七年已來諸家緣坐
配流者所在令還是歲契丹韃靼國並遣使朝貢
五年春正月辛亥詔以金鳳等三臺未入寺者施大興
聖寺是月殺定州刺史博陵王濟二月乙丑詔應官刑

者普免刑為官口又詔禁網捕鷹鷂及畜養籠放之物
己丑改東平王儼為瑯琊王詔侍中叱列長人使於周
是月殺太尉趙郡王叡三月丁酉以司空徐顯秀為太
尉并省尚書令婁定遠為司空是月行幸晉陽夏四月
甲子詔以并州尚書省為大基聖寺晉祠為大崇聖寺
乙丑車駕至自晉陽秋七月己丑詔降罪人各有差戊
申詔使巡省河北諸州無雨處境內偏旱者優免租調
冬十月壬戌詔禁造酒十一月辛丑詔以太保斛律光

為太傅大司馬馮翊王潤為太保大將軍瑯邪王儼為
大司馬十二月庚午以開府儀同三司蘭陵王長恭為
尚書令庚辰以中書監魏收為尚書右僕射是歲大英
婁國遣使朝貢

是歲陳孝宣帝太建元年

武平元年春正月乙酉朔改元太師并州刺史東安王
婁叡薨戊申詔兼散騎常侍裴獻之聘於陳二月癸亥
以百濟王餘昌為使持節侍中驃騎大將軍帶方郡公

王如故己巳以太傅咸陽王斛律光為右丞相并州刺史右丞相安定王賀拔仁為錄尚書事冀州刺史任城王潛為太師丙子降死罪己下囚閏月戊戌錄尚書事安定王賀拔仁薨三月辛酉以開府儀同三司徐之才為尚書左僕射夏六月乙酉以廣寧王孝珩為司空甲辰以皇子恒生故大赦內外百官普進二級九州職人普進二級己酉以開府儀同三司唐邕為尚書右僕射秋七月癸丑封孝昭皇帝子彥基為城陽王彥康為定

陵王彥忠為梁郡王甲寅以尚書令蘭陵王長恭為錄
尚書事中領軍和士開為尚書令癸酉以華山王凝為
太傅八月辛卯行幸晉陽九月乙巳立皇子恒為皇太
子冬十月辛巳以司空廣寧王孝珩為司徒以上洛王
思宗為司空封蕭莊為梁王戊子曲降并州死罪已下
囚己丑復顯祖文宣皇帝謚號十二月丁亥車駕至自
晉陽詔左丞相斛律光出晉州道脩城戍是歲鞞鞬遣
使朝貢

二年春正月丁巳詔兼散騎常侍劉瓌偁使於陳戊寅
以百濟王餘昌為使持節都督東青州刺史二月壬寅
以錄尚書事蘭陵王長恭為太尉并省錄尚書事趙彥
深為司空尚書令和士開為錄尚書事左僕射徐之才
為尚書令右僕射唐邕為左僕射吏部尚書馮子琮為
右僕射夏四月壬午以大司馬琅邪王儼為太保甲午
陳遣連和謀伐周議弗許六月段韶攻周汾州剋之獲
刺史楊敷秋七月庚午太保琅邪王儼矯詔殺錄尚書

事和士開於南臺即日誅領軍大將軍庫狄伏連治書
侍御史王子宣等尚書右僕射馮子琮賜死殿中八月
己亥行幸晉陽九月辛亥以太師任城王潛為太宰馮
翊王潤為太師己未左丞相段韶薨戊午曲降并州界
內死罪已下各有差庚午殺太保琅邪王儼壬申陳人
來聘冬十月罷京畿府入領軍府己亥車駕至自晉陽
十一月庚戌詔侍中赫連子悅使於周丙寅以徐州行
臺廣寧王孝珩為錄尚書事庚午以錄尚書事廣寧王

孝珩為司徒癸酉以右丞相斛律光為左丞相

隋書五行志曰是年有兔出廟社中

三年春正月己巳祀南郊辛亥追贈故琅邪王儼為楚
帝二月己卯以衛菩薩為太尉辛巳以并省吏部尚書
高元海為尚書右僕射庚寅以左僕射唐邕為尚書令
侍中祖珽為左僕射三月辛酉詔文武官五品已上各
舉一人是月周誅冢宰宇文護夏四月周人來聘秋七
月戊辰害左丞相戊陽王斛律光及其弟幽州行臺荆

山公豐樂八月庚寅廢皇后斛律氏為庶人以太宰任
城王潛為右丞相太師馮翊王潤為太尉蘭陵王長恭
為大司馬廣寧王孝珩為大將軍安德王延宗為司徒
詔領軍封輔相聘於周戊子拜右昭儀胡氏為皇后己
丑以司州牧壯平王仁堅為尚書令特進許季良為左
僕射彭城王寶德為右僕射癸巳行幸晉陽是月脩文
殿御覽成勅付史閣九月陳人來聘冬十月降死罪以
下囚甲午拜弘德夫人穆氏為左皇后大赦十二月辛

丑廢皇后胡氏為庶人

隋書五行志曰是年龍見邯鄲井中氣五色屬天
是歲新羅百濟勿吉突厥並遣使朝貢周建德元年
四年春正月戊寅以并省尚書令高阿那肱為錄尚書
事庚辰詔兼散騎常侍崔象使於陳是月鄴都并州並
有狐媚多截人髮二月乙巳拜左皇后穆氏為皇后丙
午置文林館乙卯以尚書令北平王仁堅為錄尚書事
丁巳行幸晉陽是月周人來聘三月辛未盜入信州殺

刺史和士休南充州刺史鮮于世榮討平之庚辰車駕
至晉陽夏四月戊午以大司馬蘭陵王長恭為太保大
將軍定州刺史南陽王綽為大司馬大司馬太尉衛菩
薩為大將軍司徒安德王延宗為太尉司空武興王晉
為司徒開府儀同三司宜陽王趙彥深為司空癸丑祈
皇祠壇壇之內忽有車軌之轍案驗傍無人跡不知
車從所來乙卯詔以為大慶班告天下己未周人來聘
五月丙子詔史官更撰魏書癸巳以領軍穆提婆為尚

書左僕射以侍中中書監段孝言為右僕射是月開府
儀同三司尉破胡長孫洪畧等與陳將吳明徹戰於呂
梁南大敗破胡走免洪畧戰歿遂陷秦涇二州明徹進
陷和合二州是月殺太保蘭陵王長恭六月明徹進圍
壽陽壬子幸南苑從官暘死者六十人以錄尚書事高
阿那肱為司徒丙辰詔開府王師羅使於周秋九月校
獵於鄴東冬十月陳將吳明徹陷壽陽辛丑殺侍中崔
季舒張彫唐敬騎常侍劉逖封孝琰黃門侍郎裴澤郭

遵癸卯行幸晉陽十二月戊寅以司徒高阿那肱為右
丞相是歲高麗靺鞨並遣使朝貢突厥使求婚

五年春正月乙丑置左右城英各一人二月乙未車駕
至自晉陽朔州行臺南安王思好反辛丑行幸晉陽尚
書令唐邕等大破思好思好投火死焚其尸并其妻李
氏丁未車駕至自晉陽甲寅以尚書令唐邕為錄尚
書事夏五月大旱晉陽得死魃長二尺面頂各二目帝
聞之使刻木為形以獻庚申大赦丁亥陳人侵淮北秋

八月癸卯行幸晉陽甲辰以高勣為尚書右僕射是歲
殺南陽王綽

六年春三月乙亥車駕至自晉陽丁丑烹祆賊鄭子饒
於都市是月周人來聘夏四月庚子以中書監陽休之
為尚書右僕射秋七月甲戌行晉陽八月丁酉冀定趙
幽滄瀛六州大水是月周師入洛川屯芒山攻逼洛城
縱火船焚浮橋河橋絕閏月己丑遣右丞相高阿那肱
自晉陽禦之師次河陽周師夜遁庚辰以司空趙彥深

為司徒斛律阿列羅為司空辛巳以軍國資用不足稅
關市舟車山澤鹽鐵店肆輕重各有差開酒禁是歲靺
鞨遣使朝貢

隋書五行志曰宮中有數圍大樹無故自拔齊以木
德王亡國之兆 又并州招遠樓下有赤蛇與黑蛇
鬪數日赤蛇死赤齊色黑周色赤死亦齊亡象

七年春正月壬辰詔去秋已來水潦人饑不自立者所
在付大寺及富戶濟其性命甲寅大赦乙卯車駕至自

晉陽二月辛酉括雜戶女年二十以下十四已上未嫁
悉集省隱匿者家長處死刑二月丙寅風從西北起發
屋拔樹五日乃止夏六月戊申朔日有蝕之庚申司徒
趙彥深卒秋七月丁丑大雨霖是月以水滂遣使巡撫
流亡民戶八月丁卯行幸晉陽雉集御座獲之有司不
敢聞詔營邯鄲宮冬十月丙辰帝大狩於祁池周師攻
晉州癸亥帝還晉陽甲子出兵大集晉祠庚午帝發晉
陽癸酉帝列陣而行上雞栖原與周齊王憲相對至夜

不戰周師歛陣退十一月周武帝退還長安留偏師守

晉州

顏氏家訓曰張延雋為青州行臺左丞匡維主將鎮撫疆場儲器愛民隱若敵國羣小不得行志同力排之既代後公私擾亂周師一舉此鎮先平齊亡遂啓於此

高阿那肱等圍晉州城戊寅帝至圍所十二月戊申周武帝來救晉州庚戌戰於城南帝棄軍先還齊軍大敗

癸亥入晉陽憂懼不知所之甲寅大赦帝謂朝臣曰周師甚盛若何羣臣咸曰一得一失自古皆然宜停百賦安朝野收遺兵背城死戰以存社稷帝意猶豫欲向壯朔州乃留安德王延宗廣寧王孝珩等守晉陽不守即欲奔突厥羣臣皆不可帝不從開府儀同三司賀拔伏思封輔相慕容鍾葵等宿衛近臣三十餘人西奔周師乙卯詔募兵遣安德王延宗為左廣廣寧王孝珩為右廣延宗入見帝帝告欲向壯朔州延宗泣諫不從帝密

遣王康德與中人齊紹等送皇太后皇太子於吐朔州
丙辰帝幸城南軍營勞將士其夜欲遁諸將不從丁巳
大赦改武平七年為隆化元年

隋書五行志曰時人離合其字曰降死竟以降周死
其日穆提婆降周詔除安德王延宗為相國委以備禦
延宗流涕受命帝乃夜斬五龍門而出欲走突厥從官
多散領軍梅勝即叩馬諫乃迴鄴時唯高阿那肱等十
餘騎廣寧王孝珩襄城王彥道續至得數十人同行戊

午延宗從衆議即皇帝位於晉陽改隆化為德昌元年
庚申帝入鄴辛酉延宗與周師戰於晉陽大敗為周所
虜帝遣募人重加官賞雖有此言竟不出物廣寧王孝
珩奏請出宮人及珍寶班賜將士帝不悅斛律孝卿居
中受委帶甲處分請帝親勞為帝撰辭且曰宜慷慨流
涕感激人心帝既出臨衆將令之不復記所受言遂大
笑左右亦羣哈將士莫不解體自大丞相已下太宰大
司馬三師大將軍三公等官並增負而授或三或四不

可勝數甲子皇太后從北道至引文武一品已上入朱
華門賜酒食及紙筆問禦周方畧羣臣各異議帝莫知
所從又引高元海宋士素盧思道李德林等欲議禪位
皇太子先是望氣者言當有革易於是依天統故事授
位幼主

幼主名恒後主長子母穆皇后武平元年六月生於鄴
其年十月立為皇太子隆化二年春正月乙亥即皇帝
位時年八歲改元為承光元年大赦尊皇太后為太皇

太后帝為太上皇帝后為太上皇后於是黃門侍郎顏之推中書侍郎薛道衡侍中陳德信等勸上皇往河外募兵更為經畧若不濟南投陳國從之丁丑太皇太后上皇自鄴先趣濟州周師漸逼癸未幼主又自鄴東走已丑周師至陌陌橋癸巳焚城西門上皇將百餘騎東走乙亥渡河入濟州其日幼主禪位於大丞相任城王潛令侍中斛律孝卿送禪文璽綬於瀛州孝卿持之歸周又為任城王詔尊上皇為無上皇幼主為守國天王

留太皇太后濟州遣高阿那肱留守上皇并皇后攜幼
主走青州韓長鸞鄧顥順等數十人從上皇既至青州
即為入陳計而高阿那肱召周軍約生致齊主乃屢使
人告賊軍在遠今令人燒斷橋路上皇所以停緩周軍
奄至青州上皇窘急將遜於陳置金囊韋後與長鸞淑
妃等十餘騎至青州南鄧村為周將尉遲綱所獲送鄒
周武帝與抗賓主禮

三國典畧曰齊主綿夢黑衣貴人迭相驅逐已向之

拜

并太后幼主諸王俱送長安封帝溫國公至建德七年
誣與宜州刺史穆提婆謀反及延宗等數十人無少長
咸賜死神武子孫所存者一二而已

愚按神武所存子孫不止一二齊諸王傳可考惟武
成子仁英雅得免當云一二耳

大象末陽休之陳德信等啓大丞相楊堅請收葬聽之
葬於長安北原洪瀆川帝幼而令善

冊府元龜曰幼時曾讀詩賦語人云終有解作此理
否

及長頗學綴文置文林館引諸文士而言語澁訥無志
度不喜見朝士非寵私昵狎未嘗交語性懦不堪人視
視者即忿責其奏事者雖三公令錄莫得仰視皆畧陳
大旨驚走而出每災異寇盜水旱亦不自貶損唯諸處
設齋以此為脩德雅信巫覡解禱無方初琅邪王儼舉
兵人告者誤云庫狄伏連反帝曰必仁威也又斛律光

死後諸武官舉高思好堪大將軍帝曰思好喜反皆如
所言遂自謂策無遺笑乃益驕縱盛為無愁之曲自彈
胡琵琶而唱之侍和者百數人間謂之無愁天子常出
見羣屬盡殺之或殺人剥面皮視之任陸令萱和士開
高阿那肱穆提婆韓長鸞等宰制朝政陳德信鄧長顓
何洪珍參預機權各引親黨起居非次官由財進獄以
賄成亂政害民難以備載諸官奴婢閹人商人胡戶雜
戶歌舞人見鬼人濫得富貴者將以萬數庶姓封王者

將以百數不復可紀開府千餘儀同無數領軍一時三十連判文書各作依字不具姓名莫知誰也諸貴寵祖禰追贈官歲一進位極乃止宮掖婢皆封郡君宮女寶衣玉食者五百餘人

隋書五行志作千餘人

一裙直萬疋鏡臺直千金競為變巧朝衣夕弊

隋書五行志曰後主好令宮人以白越布折額狀如盤幘又為白蓋皆喪禍之服

承武成奢麗以為帝王當然乃更增益宮苑造偃武脩
文臺其嬪嬙諸院中起鏡殿寶殿璫瑁殿丹青彫刻妙
極當時又於晉陽起十二院壯麗過鄴下所愛不恒數
日又復夜以火照作寒以湯為泥百工困窮無時休息
鑿晉陽西山為大佛像一夜燃燈油萬盆光照宮內又
為胡昭儀起大慈寺未成改為穆皇后大寶林寺窮極
工巧運石填泉勞費億計人牛死者不可勝紀

隋書食貨志曰計財用不給乃減朝士祿斷諸曹糧

膳及九州軍民常賜以供之

御馬則藉以羶罰食物有十餘種將合牝牡則設青廬具牢饌而親觀之狗飼以梁肉馬及鷹犬有儀同郡君之號故有赤彪儀同逍遙郡君陵霄郡君高思好書所謂馱龍逍遙著也犬於馬上設褥抱之鬪雞亦號開府犬馬雞鷹多食縣幹鷹之入養者稍割犬肉飼之至數日乃死又於華林園立貧窮村舍帝自弊衣為乞食兒又為窮兒之市躬自交易寓築西鄙諸城黑衣為羌兵

鼓譟陵之親率內參臨拒或入彎弓射人自晉陽東巡
單馬馳驚衣解髮散而歸又好不急之務曾一夜索蝎
及旦得三升特愛非時之物取求火急皆須朝徵夕辨
當勢者因之貸一責十賦歛日重徭役日煩民力既殫
藏空竭乃賜諸佞幸賣官或得郡兩三或得縣六七各
分州郡下逮鄉官亦多降中者故有敕用州主簿敕用
功曹於是州縣職司多出富商大賈競為貪縱民不聊
生爰自鄴都及諸州郡所在徵稅百端俱起

隋書食貨志曰齊武平陵權倖並進賜與無限加之
旱蝗國用轉屈乃料境內六等富人調令出錢願之
推奏請立關市邸店之稅鄧長顥贊成之後主大悅
於是以其所入供御府聲色之費軍國之用不豫未
幾亡

凡此諸役皆漸於武成至帝增廣然未嘗有帷薄淫穢
唯此事頗優於武成云初河清末武成夢大蜚攻破鄴城
故索境內蜚膏以絕之識者以後主名聲與蜚相協亡

齊徵也又婦人皆翦剔著假髻危邪之狀如飛鳥至於南面則髻心正西始自內宮為之被於四遠天意若曰元首翦落危側當走西也

隋書五行志曰齊鄴中有童謠曰金作掃帚玉作把
淨掃殿屋迎西家至是驗

又為刀子者及皆狹細名曰盡勢遊童戲者好以兩手持繩拂地而却上跳且唱曰高末高末之言蓋高氏運祚之末也

三國典畧曰齊後主末有九頭鳥見色赤似鴨九頭
皆鳴

然則亂亡之數蓋有兆云

論曰武成風度高爽經筭弘長文武之官俱盡謀力有
帝王之量矣但愛狎庸豎委以朝權帷薄之間淫侈過
度滅亡之兆其在斯乎玄象告變傳位元子名號雖殊
政由已出迹有虛飾事非憲典又河南河間太原樂陵
諸王或以時嫌或以猜忌皆無罪而殞非所謂知命任

天體大道之義也後主以中庸之姿懷易染之性永言
先訓教匪義方始自襁褓至於傳位隔以正人閉其善
道養德所履異乎春誦夏弦過庭所聞莫非不軌不物
輔以中官妳媼屬以麗色淫聲縱構繼之娛恣朋淫之
好泊乎在御彌見淪胥罕接朝士不親政事一日萬幾
委諸凶族內侍帷幄外吐絲綸威厲風霜志迴天日虐人
害物搏噬無厭賣獄鬻官谿壑難滿重以名將貽禍忠
臣顯戮始見浸溺之萌俄觀土崩之勢周武因機遂混

區夏悲夫蓋桀紂罪人其亡也忽焉自然之理矣

唐魏徵論曰神武以雄傑之姿始基霸業文襄以英明之略伐叛柔遠於時喪君有君師出以律河陰之役摧宇文如反掌渦陽之戰掃侯景如拉枯故能氣懾西隣威加南服文宣因累世之資遂遷魏鼎懷譎詐非常才運屈竒不測之智網羅俊乂明察臨下文武名臣盡其力用親戎出塞命將臨江定單于於龍城納長君於梁國外內充實疆場無警胡騎息其南侵秦人不敢東顧

既而荒淫敗德罔念作狂為善未能亡身餘殃足以傳
後得以壽終幸也肩嗣不永宜哉孝昭地過身危逆取
順守外敷文教內蘊雄圖將以牢籠區域奄有函夏享
齡不永績用無成若或天假之年足使秦吳旰食武成
即位邪道陵遲昭襄之風摧焉已墜暨乎後主外內崩
離衆潰平陽身禽青土天道深淵或未易談吉凶由人
抑可揚摧觀夫有齊全盛控帶遐阻西包汾晉南極江
淮東盡海隅壯漸沙漠六國之地我獲其五九州之境

彼分其四料甲兵之衆寡校帑藏之虛實折衝千里之
將帷幄六奇之士二方之優劣無等級以寄言然其太
行長城之固自若也江淮汾晉之險不移也帑藏輸稅
之富未虧也士庶甲兵之衆不缺也然前王用之有餘
後主守之不足何哉前王御時沐風櫛雨拯其弱而救
其焚信必賞過必罰安而利之既與共其存亡同其生
死後主則不然以人從欲損物利已雕墻峻宇甘酒嗜
音廓肆遍於宮園禽色荒於內外俾畫作夜罔水行舟

所欲必成所求必得既不執不物又暗於聽受忠信弗聞萑菲必入視人如草芥從惡如順流佞閹處當軸之權婢媼擅回天之力賣官鬻獄亂政淫刑剗削被忠良祿位加於犬馬讒邪並進法令多聞持獻者非止百人搖樹者不唯一手於是土崩瓦解衆叛親離顧瞻周道咸有西歸之志方更盛其宮觀窮奢極淫謂黔首可愚指白日自保驅倒戈之旅抗前歌之師五世崇基一舉而滅豈非鐫金石者難為功摧枯朽者易為力歟抑又

聞之皇天無親唯德是輔齊自河清逮於武平土木之
工不息嬪嬙之選無已征稅盡人力殫物產無以給其求
江海不能贍其欲所謂火熾矣更負薪以足之數既窮
矣又為惡以促之欲求大厦不燔延期過厯不亦難乎
由此言之齊氏敗亡蓋亦由人匪惟天道也

南史合注卷九十四